

Azkeneko igandea Urtean Zehar (A)

**JESU KRISTO GURE JAUNA,
DIREN GUZTIEN ERREGEA**

Festaburua

Otoitza

Jainko ahalguztidun betierekoa,
zeure Seme maitea, diren guztien Erregea,
gauza guztien oinarri eta buru ezarri zenuen;
egizu, izaki guztiek,
bekatuaren uztarritik askatuta,
beti eta beti Zu zerbitza zaitzatela eta goretsi.
Zure Seme Jesu Kristo.

I. IRAKURGAIA: Ez 34, 11-12. 15-17

*Zuek, nire ardiok, entzun:
Epai egingo dut Nik ardi eta ardiren artean.*

Ezekiel Profetaren liburutik

Honela dio Jaunak: «Ni neu joango naiz nire ardiak biltzera, haien aztarrenei jarraituz. Artzainak, bere artaldea sakabanatuta aurkitzean, ardien aztarrenei jarraitzen dien bezala, hala jarraituko diet Nik nire ardien aztarrenei; eta egun ilun eta lainotsuan sakabanatu diren toki guztietatik nire eskuz aterako ditut.

Neuk larratuko ditut nire ardiak, eta abaro eginaraziko diet –dio Jaunak–. Bilatuko ditut galduak; bilduko ihes joanak; lotuko zaurituak; sendatuko gaixoak; gizen eta indartsuak zaindu egingo ditut eta behar bezala larratuko».

Zuek, nire ardiok, entzun Jaunak dioena: Epai egingo dut Nik ardi eta ardiren artean, ahariaren eta akerraren artean.

ERANTZUN SALMOA: Sal 22, 1-3. 5. 6

**R/. Jauna dut artzain,
ez naiz ezeren beharrea.**

Jauna dut artzain, ez naiz ezeren beharrea:

larre gurietan etzanarazten nau.

Atsedenezko iturrira narama

eta birbizten dit barrena.

Banarama bidezidor zuzenetatik

bere izenagatik. R/.

Atontzen didazu mahaia,
etsaiak dauzkadala begira;

olioz gantzuten didazu burua,
gainezka dago nire edontzia. R/.

Zoriona eta grazia ditut aldean,
neure bizi guztiko egunetan;
eta Jaunaren etxean naiz biziko
luzaroen luzaro. R/.

II. IRAKURGAIA: 1 Kor 15, 20-26a. 28

*Jainko Aitari itzuliko dio erreinua,
eta horrela, guztia izango da Jaungoikoa guztientzat.*

San Paulo Apostoluak Korintotarrei

Senideok: Biztu da Kristo hilen artetik, lo daudenetan lehen fruitu bezala. Izan ere, gizon baten bidez etorri bazen heriotza, gizon baten bidez etorri da hildakoen biztuera ere. Adanengan guztiak heriotza duten bezala, Kristorengan bizia izango dute guztiak. Baina bakoitzak bere mailan: aurrena Kristok, lehen fruitu bezala; gero kristau guztiak, Hura berriz etortzean. Ondoren, azkenekoek, Kristok Jainko Aitari erreinua itzultzen dionean, ahalmen, aginte eta indar guztiak ezereztu ondoren. Berak eduki behar baitu erregetza, Jainkoak «etsai guztiak Haren oinazpian ipini arte». Heriotza izango da, azkenik ezereztuko den etsaia. Gauza guztiak Haren menpean aurkitzen direnean, orduan Semea bera ere menpean jarriko zaio, gauza guztiak azpian ipini zizkion Aitari. Eta horrela, guztia izango da Jaungoikoa guztientzat.

EBANJELIOA: Mt 25, 31-46

Aleluia: Mk 11, 10

R/. Aleluia.

V/. Bedeinkatua, Jaunaren izenean datorrena!
Bedeinkatua, gure aita Dabidengandik
datorren erreinua! R/.

*Bere jaun aulki ospetsuan eseriko da;
eta batzuk besteengandik bereiziko ditu.*

Jesu Kristoren Ebanjelioa San Mateoren liburutik

Aldi hartan, Jesusek honela esan zien bere ikasleei: «Gizonaren Semea—eta aingeru guztiak Harekin—bere aintza handitan etortzen denean, bere jaun aulki ospetsuan eseriko da; eta herri guztiak Haren aurrean bilduak izango dira. Hark batzuk besteengandik bereiziko ditu, artzainak ardiak ahuntzengandik bereizten dituen bezala: ardiak bere eskuin aldean ipiniko ditu, ahuntzak, berriz, ezker aldean. Orduan erregek honela esango die bere eskuinekoei: "Zatozte, nire Aitaren bedeinkatuok; hartazue, munduaren sortzetik prestaturik dagoen erreinua. Gose bainintzen, eta zuek jaten eman zenidaten; egarri nintzen, eta edaten eman zenidaten; arrotz nintzen, eta etxean hartu ninduzuen; biluzik nengoan, eta jantzi egin ninduzuen; gaixorik nintzen, eta ikustera etorri zineten; espetsuean nengoan, eta niregana etorri zineten".

Orduan zintzoek erantzungo diote: "Jauna, noiz ikusi zintugun goserik, eta eman genizun jaten; edota egarri, eta edaten eman? Noiz ikusi zintugun arrotz, eta etxean hartu

Noiz ikusi zintugun gaixorik edota espetxean, eta joan ginen zuregana?"

Eta erregek erantzun eta esango die: "Benetan diotsuet: nire senide diren txiki hauetako bati egin, neuri egin zenidaten".

Orduan honela esango die ezkerrekoiei: "Alde niregandik, madarikatuok, deabruarentzat eta haren aingeruentzat prestaturik dagoen betiko sutara. Gose bainintzen, eta ez zenidaten jaten eman; egarri nintzen, eta ez zenidaten edaten eman; arrotz nintzen, eta ez ninduzuen etxean hartu; biluzik nengoen, eta ez ninduzuen jantzi; gaixorik eta espetxean nengoen, eta ez zineten ni ikustera etorri".

Haiek erantzungo diote: "Jauna, noiz ikusi zintugun goserik edota egarri, arrotz, biluzik, gaixorik edota espetxean, eta guk lagundu ez?"

Orduan erantzungo die: "Benetan diotsuet: txiki hauetako bati egin ez zeniotena, neuri ez zenidaten egin".

Eta hauek betiko oinazetara joango dira; zintzoak, berriz, betiko bizitzara».

Oparigaien gainekoa

Gizakia Zurekin baketzen duen oparia eskainiz,
apalik eskatzen dizugu, Jauna:

zure Semeak berak eman diezaiela herri guztiei
batasuna eta bakea.

Errege bizi baita.

Prefazioa

Jesu Kristo, diren guztien Errege

V/. Jauna zuekin.

R/. Eta zure espirituairekin.

V/. Gora bihotzak.

R/. Jaunagan dauzkagu.

V/. Eskerrak Jaungoiko gure Jaunari.

R/. Egoki da eta zuzen.

Egoki da, bai, eta zuzen
nonnahi eta beti Zuri eskerrak ematea,
Jauna, Aita guztiz santu,
Jaungoiko ahalguztidun betiereko Horri.

Zure Seme bakarra, Jesu Kristo gure Jauna, poz olioiz gantzutuz,
betiko apaiz eta diren guztien Errege sagaratu duzu,
gurutzeko aldarean bere burua
opari garbi eta baketzaile eskainiz,
gure erospenaren misterioa betetzeko;

eta izaki guztiak bere menpeko eginik,
Zuri, Jaun guztiz handi Horri, eskura emateko
mugarik ez daukan betiko erreinua,
egiaren eta biziaren erreinua,
santutasun eta graziaren erreinua,

zuzentasun, maitasun eta bakearen erreinua.

Horregatik, aingeru eta goiaingeruekin
eta zeruko talde guztiekin,
zure aintzari goratzarre hau
beti eta beti [esaten] abesten diogu:

Santu, Santu, Santua...

Jaunartze ondorengoa

Betiereko biziaren ogia harturik, Jauna,
Zuri deiez gaude:
Kristo zeru-lurren Erregearen aginduak betetzea
aintzagarri daukagunok
irits dezagula
Berarekin zeruetako erreinuan beti bizitzea.
Errege bizi baita.